



A lokisetse Morena Sechaba se phethehileng (Luka 1,17)

Tel: 28 350 466/ 62600983 (WhatsApp)

M5.00

# MOELETSI OA BASOTHO

PARARE DOMINO PLEBEM PERFECTAM




Vodacom e fana ka  
menyetla

2

Bahlahisi  
ba tlokotsing

8


[www.moeletsioabasotho.co.ls](http://www.moeletsioabasotho.co.ls)


Re se re fumaneha ho  
marangrang

Email: [newsroom@moeletsioabasotho.co.ls](mailto:newsroom@moeletsioabasotho.co.ls)  
Tel: +266 28350466/ Whats app: 62600983

# MOELETSI

## Lilemo li'a loeana

**L**ilemong tsa ho feta ha mebuso e ntse e fetoha, re ile ra tloetsoa ho bona baikarabellang ba bua ho feta ho phethisa. Ha o thotse o shebeletse 'muso o litulong, motho o bona o fetotse litaba tseo kaofela, ka hore bona ba bontša ka liketso ho feta ho buoa.

Ha o pota ka nqena kapa o tsoa a lena lekhalo o bona hore sechaba se fumana lintlafatso, ke motlakatse, ke metsi, ke lit-sela, ke liphaposi tsa ho rutela. Taba ee e tiisa hore ka selemo sa 2030 Mosotho e mong le e mong a be a e na le motlakase e hlile ke 'nete? Morao tjena e bile ho fehloa le oa letsatsi le ho eketsa phehlo ka metsi. 'Me taba ena ka bo eona e tl'o tiisa kholo ntlafatsong ea moruo oa naha ea rona, hobane ke moo re tl'o o rekisetsa le linaha tsa bohalani.

Motlakase o tsoentse naha nako e telele haholo, 'me hajoale phephelo ea motlakase e se e le e 'ngoe ea litšia tse matla tsa 'muso tseo o tlang ho aha moruo o tlokomang le ho abelanoa ho bohle. Motlakase o tl'o etsa hore litšebeletso li ntlafale, metseng le malapeng le sechabeng ka kakaretso. Thuto e bonahala e ne e se e theohile haholo likolong tse ka maloting, ka lebaka la ho hloka motlakase, barutoana ba salla morao haholo litabeng tsa marang-rang. Likolo, Litsi tsa Bophelo le likereke taba eo e se e tl'o ba pale ea maobane.

Re ne re lula re ipotsa lipotso tse ngata, feela re sa fumane likarabo, hore na basali ha ba kene likopano tsa kereke bona haesale basali na? Ke shebile haholo ha ho ketekeloa khoeli ea mosali oa Moafrika kapa hona ha e koaloa. Re thoholetsa sena se entsoang ke Kopano ea Pelo e Tlotlehang ea Jesu St. Leo, Ha Makhathi, ea hore ba bolelloe bohlokoa ba bona e le basali ba kopano.

Utlola mantsoe a monate a eang ho bona, "lea utluoa, lea ananeloa, le matla, le lokela ho hlompheua, ho sireletsoa, ho bababllao le ho eloa hloko. 'Me matla a lona a lokela ho bonahala kholong ea tumelo, e bang basali ba matla thapelong, ba ahang e seng ba heletsang kapa hona ho nyenyefatsa ba bang, hore qetellong bohle ba atlehe ho fihlela seo ba leng sona. Hopolang basali khoeli ea Phato e le hopotsa bohle hore le lokela ho ithokomela, ho ikemela le ho hlompheba bang".

Le'a tseba hore moo basali ba kopaneng matla a lona a ka linako tsohle a bonahala ka liketsahalo tse tsoarehang, 'me ho bohlokoa hore le hlomphe seo le leng sona. Hangata basali ba fumana khotso moo ba kopaneng e le bona feela, ka hona bontate ha re tsoaraneng ka matsoho le bona, le ho phelisana ka lerato le bonngoe. Basali tsamaeang le il'o fetoha letsoai malapeng le metseng ea bo lona, 'me ke lona ke la fetolang polelo e reng motse oo o lutse botleng, empa metsi a ona a ea baba.

Naha ea Lesotho e ntle haholo bakeng sa ho hoela bahahlau-li. Lefika la Raboshabane ke leng le ka amahangoang le nalane ea Mothehi oa sechaba sa Basotho. Hana ho ne ho boleloang ha ho tla thoe letlapa le theletse la Raboshabane, hana eena ke mang, hone ho etsahalang? Lipotso tsena lintle haholo ho litsebi tsa nalane, joale ka mane moo ba tlang ho li manollela bahahlau-li.

Sechaba se phelang tikolohong eno ea Koro-koro se ka imona monoana, hobane joale se tla tseba ho rekisa lijo tsa Sesotho, se fane ka matlo a marontabile bakaeng sa boroko bakeng sa baeti. Na taba eo ha se kholo ea moruo oa naha le ho fenya bofuma le tlala, thokahalo ea mesebetsi? Re eletsa lekala le ikarabellang ho etala sebaka seo hobane se tsoere nalane ea bohlokoa haholo ho bana ba likolo, ba ke ba rutoe ka Malimo ana.

Likoluoa ha se ntho e reroang ke motho, e ithahela feela ka tšohanyetso, 'me e tla ka libopoho tse ngata, e kaba meea e mengata, likhohola, lipula tse matla esitana le ho khetheha ha lehloa le lengata. Lefapha la Thibelo le Taolo ea Likoluoa ka kopanelo le Lefapha la tsa Bolepi, ba tsoile letšolo ho ruta sechaba, empa leha ho le joalo litaba tseno li kena ka tsebe ena li tsoa ka eane. Basotho mamelang likeletso ho tsoa ho litsebi tsa bolepi e le ho qoba likotsi kapa mathata a sa hloka haleng, ho molemo ho ipaballa ho feta ho oela kotsing.

### MOLIMO A BOLOKE LESOTHO LE BASOTHO

## VODACOM e fana ka monyetla

### Nthabeleng Seithleko

**K**amphani ea marang-rang le thekiso ea mehala ea thekeng Vodacom Lesotho e buletse likhoebo tse nyenyane le tse mahareng (SMEs), monyetla oa ho bontša le ho rekisa lihlahisoa le litšebeletso tsa tsona, moketeng oa ho keteka lilemo tse 30 tsa kamphani, o tla tsoareloa Mabaleng a Maseru Club ka la 19 Loetse monongoaha.

Motsamaii oa Likamano tsa Sechaba le Lipuisano tsa Kamphani ea Vodacom, Lebohang Chefa o itse morero ona ke ho fa likhoebo tsa Basotho monyetla oa ho bonahala haholoanyane, ho fihlela bareki ba bangata le ho fumana monyetla ea ho holisa likhoebo tsa tsona. Tsena o li buile ka la 2 Loetse monongoha.

Chefa o boletse hore li-SME esale e le karolo ea leeto la Vodacom la lilemo tse 30, e le bareki, balekane le bafani ba litšebeletso tse

tšehetsang bophelo ba batho ba bangata, ka hona ho li kenyetsetsa meketeng ena ke sesupo sa boitlamo ba kamphani ba ho hokahanya batho bakeng sa bokamoso bo atlehileng.

O hlalositse hore ho nka karolo mahala, ke ho tlosa litšitiso tsa lichelete le ho fa bo-rakhoebo ba bangata ba Basotho monyetla oa ho nka karolo.

Ho latela Chefa, likhoebo tse tla khethoa li tla fuoa mabala a mahala moo li tla bontšang le ho rekisa lihlahisoa le litšebeletso tsa tsona, li fihlele bareki ba bacha le ho matlafatsa ponahalo ea tsona 'marakeng.

O itse Vodacom Lesotho e behile mabala a ka bang 60 bakeng sa li-SME tse tla nka karolo, 'me mohato ona o tla fa likhoebo monyetla oa ho buisana ka kotlolo ho le bareki, ha ka nako e tsoanang ho khothalletsoa likhoebo tseo e leng tsa Basotho.

Mothehi oa lihlahisoa tsa matsohong ka lekoko, Sebatso Ralelimo, o itse matsapa a kang ana a fa likhoebo tse nyenyane sethala sa ho bontša lihlahisoa tsa tsona le ho theha likamano le bo-rakhoebo ba bang.

O re monyetla ona ha o felle feela ka ho rekisa, empa ke mohato oa bohlokoa o ka bulang monyetla e meng, kaha motho a ke ke a tseba hore na katleho ea hae e tla fumanoa hokae neng. Ralelimo o lebohile Vodacom ka ho lula e nahanela li-SME, a khothalletsa bo-rakhoebo ba bang hore ba se ke ba nyatsa monyetla e joalo.

Ka lehlakoreng le leng, Matebele Lekunye, ea et-sang a bile a rekisang lieta tsa sesotho, o itse o thabetse monyetla ona, 'me o ikemiselitse ho nka karolo liketsahalang tse joalo, kaha li ba fa monyetla oa ho tsebahala.

O boletse hore Basotho ba rata haholo liketsahalo tsa boithabiso, 'me liketsahalo tsena li ba thusa ho fumana bareki. O itse boholo ba thekiso ea hae bo tsoa ho bareki ba ileng ba bona lihlahisoa tsa hae liketsahalang tse fapaneng.

Vodacom Lesotho e mema likhoebo ho nka karolo ka ho rekisa lijo le lino-mapholi, ho fana ka lipapali tsa bana, ho bontša lihlahisoa tsa tsona le ho buisana le sechaba ka litšebeletso tseo li fanang ka tsona.



**Contacts: +266 28350 466**

**62600983 WhatsApp**

**Email: [newsroom@moeletsiobasotho.co.ls](mailto:newsroom@moeletsiobasotho.co.ls)**

**Sales and Marketing: (+266) 28 350 466/ 57396597 (WhatsApp)**

**MOELETSI oa BASOTHO**  
A LOKISITSE MORENA SECHABA SE PHETHEHLENG (LUKE 1:17)

**EMAIL:** [editor@moeletsiobasotho.co.ls](mailto:editor@moeletsiobasotho.co.ls)  
sub-editor@moeletsiobasotho.co.ls  
**Mohale Lehlohonolo (Sub-editor)**  
(+266) 58 771 507 / 62 771 507

### Journalists

**Nthabeleng Seithleko**

**Tšelisio Thakholi**

**Production Desk: 'Mateele Liqa**

57 665 038/ 68 216 271

58 540 853/ 63 480 404

# Liema ka lijoko

## Nthabeleng Seitlheko

**B**oipelaetso bo ile ba qhoma femeng e rokgang liaparo ea Precious Garments ka 31 Phato monongoaha, ha basebetsi ba batla likarabo mabapi le ho fokotsoa ha lihora tsa mosebetsi, meputso e sa lefshoeng ka bottlalo likhoe ling tse 'maloa le liqoso tsa hore mosebetsi o romelloa lifemeng tse ling ka theko e tlase.

Feme ena e Maseru e ile ea emisa tšebetso ha basebetsi ba re ha ba sa khona ho mamella mathata a lichelete, ao ba reng a se a nkile likhoeli tse ka bang robeli.

Ho ea ka basebetsi, esale ba sa fumane meputso ea bona ka bottlalo, leha feme e ntse e fumana thepa eo ba ka e sebelisang tlhahisong.

Basebetsi ba batla tlhaloso e hlakileng ka mathata a feme. Tletlebo ea bona e kholo ke hore khafetsa ba beoa "short time", ha ba ntse ba belaela hore mosebetsi o romelloa lifemeng tse ling.

Ba boetse ba re ha ba e-s'o fumane litefo tsa ho arohana le mosebetsi tsa nako e telele, 'me ha ba e-s'o fu-

mane thuso e lekaneng ho tsoa ho batsamaisi ho rarolla litletlebo tsa bona.

Ba bang ba basebetsi ba boetse ba tletleba ka hore batsamaisi ba lehae ba hloka matla a lekaneng a ho sebetsana le batsamaisi ba Machaena a feme ena, e leng seo ba reng se bakile puisano e fokolang le ho lieha ho rarolla mathata.

Mamonaheng Mabote oa Ha Tšiu, ea sebelitseng Precious Garments ho tloha ka 1999, o itse ho na le pelaelo ea hore mosebetsi o romelloa lifemeng tse ling hobane li khona ho o etsa ka theko e tlase.

Mabote o itse ha basebetsi ba Precious Garments ba ka fumana chelete e ka bang M250.00 bakeng sa mosebetsi o itseng oa tlhahiso, femeng tse ling ho thoe li lefshoa hoo e ka bang M150.00 bakeng sa mosebetsi o tsoanang.

O itse ho hloka bonnete ka bokamoso ba lifeme ho mo siile a se a tšepile hore bonyane o tla fumana chelete ea tšebetso ea nako e telele, haeba boemo bo sa ntlafale. O boetse a re mathata a feme a nkile nako e telele, 'me ba bona ho hloka hore Lekala la Basebetsi le kenelle ho thu-

sa ho rarolla qabang ena.

Mosebetsi e mong oa Ha Mabote, ea qalileng ho sebetsa femeng ena ka 2015, o hlalositse kamoo ho fokotseha ha chelete eo a e fumanang ho seng ho tha-



tafalitse bophelo ba hae. O itse ho se ho le thata ho lefa rente, litefiso tsa sekolo le ho hlokomela bana ba hae.

Mosebetsi enoa o re basebetsi ba ile ba nyahama ha ba sa fumane tharollo hanghang litletlebo tsa bona, 'me ho e-na le hoo ba boleloa hore ba khutlele mosebetsing kapa ba ee hae.

O boetse a re boemo bona

bo ba nyahamisa haholo, kaha batsamaisi ba ne ba kile ba ba tiisetse hore mosebetsi o teng o tla ba boloka ba phathahane ho fihlela ka Pulungoana.

H'a araba litletlebo tsena, Motsamaisi oa feme ea Precious Garments, Tšepe Lengana, o itse taba ea hore mosebetsi o romelloa

ena ka potlako le ho buisana le ba bang ba amehang pele a fa basebetsi karabo ka Labobeli. O hlalositse hore beng ba feme ba tsoang naheng e le 'ngoe hangata ba sebelisana ha ba batla thepa ea tlhahiso, e le ho fokotsa litšenyehelo, ho kenyeletsa le ho arolelana lik'hontheinara tsa

lifemeng tse ling esale e hlalisoa ho beng ba feme ka nako e telele, haholo-holo ka lebaka la ho fokotseha ha 'liodara'. Lengana o itse o ile a boela a hlalisoa taba ena ha beng ba feme ba ne ba sa tsoa etela Lesotho, 'me a boela a buisana le mong'a feme ka Mantaha.

O itse mong'a feme o tšepisitse ho shebisisa taba

thomello.

A re mokhoa ona ka lina-ko tse ling o ka etsa hore mosebetsi o abeloe lifeme tse fapakaneng, e leng taba eo a reng esale a e hlalositse basebetsi. Boipilaetso bona bo tla nakong eo lefapha la masela le liaparo Lesotho le ntseng le tobane le khatello ea moruo le ho hloka bonnete ka 'liodara'.

## DCEO e ntša koepere moraheng

### Nthabeleng Seitlheko

**S**etsi sa Toantšo ea Bobolu le Bomenemene (DCEO) se lomme bebebe le ho matlafatsa tšebeliso ea tlhahlobo ea bophelo le matlotlo ho bahlanka ba sechaba ho thusa ho sibolla le ho thibela bobolu le bomenemene, haholo-holo moo bophelo le matlotlo a mohlanka li ka 'nang tsa se lumellane le mehloli ea bona ea chelete.

Litaba tsena tiisitsoe ke Mookameli Ofising ea Likamano le Sechaba ho DCEO, Matlhokomelo Senoko, puisanong le Koranta ena, ka la 4 Loetse monongoaha, ha a hlalosa mehatlo e nkuoang ke lefapha ho matlafatsa tšebetso ea lona

ea ho loantša bobolu.

Senoko o itse DCEO e na le melaoana le litsamaiso tse tataisang mosebetsi oa eona, ho kenyeletsa le litlhokahalo tsa hore bahlanka ba itseng ba phatlalatse le ho ngolisa maruo a bona.

O itse tlhahlobo ea bophelo le matlotlo e tla thusa lefapha ho shebisisa bophelo ba mohlanka, le tsela eo a phelang ka eona letsatsi le letsatsi, ho bapisa seo le chelete le matlotlo ao a nang le 'ona. "Ha motho a qeta ho tlaleha, re lokela ho ithuta hantle bophelo ba hae le hore na o phela joang letsatsi le letsatsi," ho boletse Senoko. O hlalositse hore mokhoa ona o boetse o tsamaellana le likhohale tsoa machaba tsa ho matlafatsa mekhoha ea ho thibela le ho sibolla bobolu.

Tlaleho ea DCEO ea 2026 e bontša hore lefapha le ntse le sebetsana le linyeoe tse 'maloa makhohleng, hammoho le litaba tsa ho khutlisa matlotlo. Har'a litaba tse thathamisitsoeng tlalehong ke nyeoe ea 'Muso Lehokoa, e amanang le taba ea sepolesa se okametseng Lefapheng la Mollo, Maseru, moo ho bontšitsoeng chelete ea M56,000.00.

Tlaleho e boetse e thathamisa Matšoanelo Nkoefoeshe, ka chelete ea M283,500.00, Motlati Velaphi, ka M500.00, le Limakotso Malikhetha, moo ho bontšitsoeng taba e amanang le chelete e ka bang M3Millione.

Ho boetse ho hlaha Teboho Maxwell Makoanyane, ka chelete ea M776,633.00, hammoho le nyeoe ea R v. Cecilia Rahlao & 2 Others, e amanang le chelete ea M962,650.00.

Nyeoe ea Bulara Qhobane, e amanang le Lekala la Temo, e bontšitsoe ka chelete ea M774,811.00, ha R v. Mosotho George Morupeli ka NUL e bontšitsoe ka M129,000.00.

Karolong ea ho khutlisoa ha matlotlo DCEO e bontša

taba e amanang le Matsoakae Mofolo Montana Bay Special le Themba Basil Motsamai le Mamothello Motsamai Legae Holdings, moo ho bontšitsoeng Preservation Order holim'a chelete ea M6,328,426.01.

Senoko o itse sehlopha se sebetsanang le tlhahlobo ea bophelo le matlotlo a bahlanka, hajoale se theilo ka bahlanka ba DCEO, lefapha le tla eketsa basebetsi ha mosebetsi o ntse o phahama. O kopile sechaba ho sebelisana le DCEO ka ho tlaleha liketsahalo tse belaeloang tsa bobolu le bomenemene. "Re kopa sechaba hore se sebetse le rona hantle 'me se tlalehe liketsahalo tse belaelang," ho boletse Senoko.

DCEO e re tšebeliso ea sechaba le lefapha e bohlokoa ho matlafatseng ntoa khahlanong le bobolu le ho netefatsa boikarabello ba bahlanka ba sechaba.

Ho sa le joalo, tlaleho ea DCEO ea 2026 e bontša hore ho na le linyeoe tse phethetsoeng ka Phato 2026, tse ling tsa tsona li amana le bobolu le bomenemene ba chelete.

Har'a tsona ke nyeoe ea Tsebang Ramoholi le mon-

na Mosotho, e amanang le bobolu le bomenemene ba chelete e ka bang M2,000.00. Ho latela tlaleho, ba ile ba fumanoa ba le molato 'me nyeoe ea phetheloa, o ahlotsoe lilemo tse 10 a sa itefelle a le setsing sa Tlhabollo ea Batšoaruoa.

Ho boetse ho thathamisitsoe nyeoe e amang Mamosiuoa Mohlahli, Mathapelo Besetsa le Mahomed Sheoane, e amanang le bobolu le bomenemene ba chelete e ka bang M16,500.00. Tlaleho e bontša hore ba ile ba fumanoa ba le molato 'me ba ahloleloa ho hlola lilemo tse 'ne setsing sa Tlhabollo ea Batšoaruoa "me halefo ea tsona ea fanyeo lilemo tse tharo motho ka mong. Linyeoe tsena li hlalella tlalehong hammoho le linyeoe tse ling tse ileng tsa phetheloa ka Phato 2026. "DCEO e boetse e fumane taelo ea lekhotla ea ho sireletsa matlotlo a boleng ba M6,328,426.01, e le hore matlotlo ao a se ke a fallisoa kapa a lahleha ha lipatlisiso li ntse li tsoela pele.

Tlhokomeliso: Mabitso a batho ba kaholimo a nkuoe tlalehong ea DCEO; ho hlalaha ha motho tlalehong kapa nyeoeng ha ho bolele hore o fumanoe a le molato, kaha liqoso li lokela ho ahloloa ke lekhotla.



# MOELETSI O TŠEHETSA BACHA



## Tšeliso Thakholi

Pule Posholi ke ngoana oa Mosotho ea hlahetseng Hlotse, Seterekeng sa Leribe, ea hotseng a rata temo ka pelo eohle ea hae. O tšoenngoa haholo ke ho bona masimo le majarete a mangata a sa lengoa feela bacha ba ntse ba le teng. Bacha ba filoe letlotlo le leholo e leng mobu oo e leng khauta ea Lesotho. Mocha enoa eo e leng mohlalohisi e moholo oa mefuta e fapakaneng ea meroho e kang kabeche, sepinichi, lihoete le sepaile. O boetse o tšoenngoa haholo ke ho bona bacha ba se ba tšepile liphallelo, empa ba filoe

letlotlo le leholo hakana la mobu leo ba ka iphelisang ka lona.

### MOBU

Bacha ba heso mobu o ka re etsetsa lintho tse kho- lo bophelong hafeela re ka itela, ra o sebelisa. Na bacha ba heso re lokela ho reka ntho e 'ngoe le e 'ngoe mabankeleng, empa re ntse re e-na le mokhoa oa ho itl- hahisetsa lijo? 'Na ke re ha re ikopanyeng re tle re hlole sera sena se tlala.

### KE HLOKA BOTSITSO

Bacha ba heso ha ke hopo- tse temo ke hloka botsitso, 'me sena ke bopaki ba seo ke se buang. Le ka bona ka temo ea meroho mona moo ke phelang hore ke tsetsele- la temo. Ke rata ha ke bona

mocha e mong le e mong a phela ka temo-khoebo a bile a tseba ho fepa lelapa labo le sechaba ka kakaretso.

### HO SEBETSA HA SE HO HIROA

Le lokela ho tseba hore ho sebetse ha se feela ho hiroa, empa le ka temo le ka tseba ho iphelisa le ho loantša tlala le tlhokahalo ea mesebetsi. Mosebetsi o kang oa temo-khoebo o mongata kantle ka mona oo bacha ba ka tsebang ho iphelisa ka oona, ho sa tsotelle- he hore na motho o fihletse thuto ea boemo bofeng.

### TLHOKAMELISO HO BACHA

Ke rata ho hlokomelisa bacha hore ho itšoarella ka matsoho ho monate ho

feta ho hiroa hobane ha hona motho ea tla mo laola mosebetsing oa hae. U tso- ha ka nako e batloang ke uena, feela u ntse u etsa bonnete ba hore u phetha mosebetsi oa hao hantle, ka nako le ka makhethe a maholo.

'Na ke na le litalenta tse ngata haholo empa ka ho khetholoha ke ipabola ka ea temo-khoebo ea lijalo tse kang poone, linaoana le meroho ka mefuta ea eona. Sa mantlha seo bacha ba lokelang ho se etsa ke ho amohela boelets, likhalemo le boikopanyo e le hore ba tsebe ho itšoarella ka mat- soho.

### HA HO TSE FUMANANG LI TONOSITSE

Bacha ba heso re tjamet- soe ke mafu a mefuta a hlo- kang batho ba nang meroho e matlafatsang 'mele. Sena re ka se fihlela ka ho lema. Bacha ba heso ke ea ipiletsa hlee! Sebelisang mobu le tle le bone ha le hlola mathata a tlala le bofuma. Ka temo ke akaretsa mefuta eohle ea lijalo. Ha re bontša boite- ko, 'muso oa habo rona o tla re phallela, ho ba Mosotho o re moketa ho tsosoa o itekang. Ruri kea le tiisetsa bacha ba haeso ha ho tse fumanang li tonositse, et- soe Mosotho o re matsoho a lemissetsa 'metso.

Bacha ha re tlheleng ho lula feela mobu o le teng. Falimehang le sa ntse le le bacha lilemong e se re la koalla serobe phiri e se e jele. Roalla le sa sele.



# Lesotho le itlhophela likoluo

## Nthabeleng Seithheko

**S**etsi sa Thibelo le Taolo ea Likoluo (DMA), ka tšebeliso-moho le Ofisi ea tsa Bolepi (LMS), e tšoare thupelo ea matsatsi a mahlano ea makala le litereke, e reretsoeng ho theha le ho netefatsa tsa bolepi le mehato ea pele ea ho arabela likoluo, e le ho matlafatsa tsunami e potlakileng le tsamaiso ea likotsi tsa likoluo.

Thupelo ena e tšoare-soe Hlotse ho tloha ka la 31 Phato ho isa la 4 Loetse, 'me e bokelletse litsi tse fapakaneng tsa bohlokoa, litsebi tsa marang-rang le baemeli ba mafapha a fapaneng a setereke.

Ofisiri ea Likamano tsa Sechaba Ofising ea Mookameli oa Setereke sa Leribe, Rasebilo Maqelepo, o itse thupelo ena e bohlokoa haholo ho sebetsana le litlamorao tsa phetoho ea boemo ba leholimo. O itse ho thehoa ha leano la tšeb-

etso ho tla thusa sechaba ho itokisetse le ho arabela litlamorao tsa phetoho ea boemo ba leholimo ha ho hloka hahala.

H'a bua ketsahalong eona eo, Motsamaisi oa DMA oa Litaba tsa Tšohanyetso le Karabelo, Retšelisitsoe Molefe, o totobalitse bohlokoa ba ho rera le ho nka mehato ea ho fokotsa likotsi ka nako. "Karabelo e

bitsa chelete e ngata ebile ha e etsahale ka nako," o boletse joalo.

H'a hlalosa merero ea thupelo, Hlooho ea LMS ea Lipatlisiso le Ntlatso ea Boqapi, eo hape e leng Moetapele oa Action First Lesotho, Moahloli Ntele, o itse mafapha a fapakaneng ba tla sebetsa 'moho le ona ho theha le ho netefatsa lihlahisoa tsa 'Impact-Based

Forecasting' (IBF), hammoho le ho matlafatsa litekanyetso tsa tšebetso.

O itse bohle ba lebelletsoe ho fana ka tsebo ea mahlale le bolepi ba leholimo, boiphihlelo tsamaisong ea likotsi tsa likoluo, tsebo ea mafapha, hammoho le maikutlo a litereke le sechaba.

Setsebi sa Bolepi ba Leholimo sa LMS, Rethabile

Mphahama o itse likotsi tse kholo tse atisang ho hlahela Lesotho li kenyelletsa lipula tse matla, likhohola tsa tšohanyetso, likhohola tsa lino-ka, komello, lifefo tse matla tsa lialuma, sefako, meea e matla le serame.

O itse mesebetsi ea bohlokoa e kenyelletsa tšebeliso-moho le litereke le ba bohlong libakeng, boitokisetso le karabelo likoluoeng, hammoho le ho etsa meralo ea maemo a tšohanyetso.

Mphahama o hlalositse hore LMS e fana ka litemoso ho latela litekanyetso tsa bolepi, matla a kotsi a lebelletsoeng le nako eo kotsi e ka tšoarellang ka eona. O itse LMS e fetisetse bolepi le litemoso ho mafapha a amehang a 'muso le lihlopha tsa karabelo maamong a tšohanyetso ka se-ea-le-moea, mecha ea litaba ea sechaba, hammoho le ka meaho ea litereke le sechaba. Litho tse ka bang tse tšeletseng tsa District Disaster Management Team (DDMT) li nka karolo thupelong ena.



## Bahlahisi ba lebese ba tlokotsing

### Nthabeleng Seithheko

**B**ahlahisi ba lebese Lesotho ba tobane le mathata a maholo a lichelete ka lebaka la ho lieha ho lefshoa ke Kamphani e e rekang lebese la lihoai le h etsa lihlahisoa (LDP).

Taba ena e hlahelletse kopanong ea bo-ralitaba e neng e tšoerole ka la 31 Phato monongopaha, moo bahlahisi ba bontšitseng hore LDP ha e e-s'o ba lefe chelete ea khoeli ea Phupu. Ka tloaelo, bahlahisi ba ne ba fumana litefo tsa bona ka la bosupa khoeli e 'ngoe le e 'ngoe.

A bua lebitsong la bahlahisi, Molefi Mabote o itse tiehiso ea litefo e baka mathata a mangata a amang sechaba le temo ka kakaretso. O itse bothata bona ha bo ame bahlahisi ba lebese feela, empa bo ama le balisana ba mehlape, barekisi ba lehae ba fepang liphoofolo le furu, hammoho le tlhokomelo le bophelo bo botle ba likhomo.

Mabote o itse bahlahisi ba lekile makhetho a 'maloa ho kopana le batsamaisi ba 'Lesotho Dairy Products' ho rarolla bothata bona, empa boiteko ba bona ha boa ka ba hlalisa litholoana.

Leha ho le joalo, o itse boemo bo ile ba hlakisoa haholoanyane ka la 19 Pha-

to, ha bahlahisi ba amohela lengolo le tsoang ho boto le hlalosing hore kamphani e tobane le mathata a lichelete, 'me e felisitse konteraka ea kabo ea lihlahisoa le Denmar.

Mohlalisi e mong oa Mazenod, Bahlakoana Manyanye, o ile a tiisa hore boemo bona bo bohloko haholo, kaha bahlahisi ba bangata ha ba na mesebetsi e meng, 'me ba iphelisa ka leruo la bona.

O itse bothata bona bo feta bophelo ba bona ka bo-

mong, kaha ba na le balisana bao le bona ba nang le malapa ao ba lokelang ho a fepa.

Manyanye o ile a nyatsa boemo bona, a re ho bonahala eka batsamaisi ba LDP ha ba nke mathata a bahlahisi ka botebo.

O totobalitse hore ka tlhahiso ea lebese, bahlahisi ba kenya letsoho phokotsong ea bofuma, ebile ba thehile menyetha ea mesebetsi bakeng sa batho ba bang.

Ka lehlakoreng le leng, setho sa boto ea LDP, Tse-

ko Bohloa o netefalitse hore litefo li liehile, a hlalosa hore mathata a lichelete a bakiloe haholo ke ho felisoa ha konteraka ea kabo ea lihlahisoa le Denmar, eo e neng e le morekisi ea ka sehloohong oa lihlahisoa tsa lebese tsa kamphani.

Leha ho le joalo, Bohloa o tiiselitse bahlahisi hore ba tla fumana litefo tsa bona nakong ea letsatsi kapa a mabeli, kaha kamphani e se e fumane lichelete tse itseng.

Ha a hlalosa leano le le-

cha la kabo ea lihlahisoa kamor'a ho felisoa ha konteraka ea Denmar, Bohloa o itse kaha Denmar e ne e le mokena-lipakeng, LDP joale e tla aba lihlahisoa tsa eona ka kotloloho ho barekisi le likhoebong kahare ho naha.

Lesotho Dairy Products (LDP) e bokella, ho sebetsa le ho bapatsa lebese le tala la likhomo le hlalisoang ke bahlahisi ba lehae ho potoloha le Lesotho. kamphani e boetse e reka lebese le tala ho lihoai le mekhatlo ea bahlahisi literekeng tse fapakaneng ka litsi tse khethiloeng tsa pokello.



# Sechaba se ketekela selemo se secha

## Nthabeleng Seitlheko

**S**echaba sa Ha Raboshabane, Koro-koro, se ketekile selemo se secha sa Basotho ka mokete oa bochaba o bitsoang Raboshabane Healing and Reconciliation Cultural Festival, o neng o tšoeroe ka la 29 Phato monongoaha.

Mokete ona o ile oa tlotloa ka boteng ba Morena oa Sehlooho oa Ha Maama, Morena Mitchell Maama, 'me o ne o tšoaretswe lefikeng la Raboshabane, lefika la nalane, la bolelele bo ka bang limithara tse 200.

Ho ea ka litlaleho tsa nalane, lefika la Raboshabane le hokahana le nalane ea Mothehi oa Basotho, Morena Mo-shoeshoe I, hammoho le nalane ea poelano lipakeng tsa Basotho le sehlopha se neng se tsejoa e le Malimo.

Morena Maama o itse mokete ona oa selemo le selemo o reretsoe ho khothaletsa Basotho ho ananela le ho boloka bochaba ba bona, ho ithuta nalaneng le ho fetisetsa tsebo eo ho bana le meloko e tlang.

O hlaositse hore mokete ona o hlophisoa tlas'a Mitchell Maama Foundation, ka sepheo sa ho khothaletsa poelano, bonngoe ba sechaba le puisano ka mekhoe ea ho eketsa tlhahiso ea lijo ho loantša bofuma le tla.



Morena Maama o itse leha palo ea batho ba bileng teng selemong sena e ne e sa lekana le eo ba neng ba e lebelletse, ba ikemiselitse ho holisa mokete ona hore o be moholo le ho feta lilemong tse tlang.

O itse sepheo ke hore sebaka sena se hohele bahahlali, e be sebaka se tsebahalang ka nalane le bochaba, 'me se fe sechaba menyetla ea moruo le matsete.

Morena oa Sebaka sa Ha Raboshabane, Mpiti Maama, o itse mokete ona o bohlokoa, kaha o kopanya sechaba le ho matlafatsa bonngoe. Leha ho le joalo, o bontšitse ngongoreho ka boemo ba litsela tse lebhang sebakeng sena, a re litsela tse sa fihlelleheng hantle li sitisa batho ba batlang ho tla moketeng le bahahlali ba ka bang le thahasello ea ho etela sebaka sena.

O ipilelitse ho 'muso hore o thuse ka ho lokisa

le ho ntlafatsa litsela e le hore Ha Raboshabane e be sebaka se ka hohelang bahahlali le ho hlalisa menyetla ea moruo bakeng sa sechaba.

Ho sa le joalo,

teng moketeng oa selemo sena kaha o mo file monyetla oa ho kopana le baahi ba bang le ho qeta nako le Morena oa Sehlooho. O itse se mo khahlileng haholo ke ho



Masenne Nkotsi, moahi oa Nkoeng ea bileng karolo ea mokete ona, o itse o thabetse ho ba

bona bana ba sekolo ba nka karolo moketeng ona, kaha sena se ba thusa ho ithuta le ho ut-

loisisa nalane le bochaba ba bona.

"Se nkhothalitseng ka mokete oa Raboshabane ke ho bona bana ba sekolo ba nka karolo, e le hore re tsebe ho ba fetisetsa nalane le ho e arolelana le bona," o boletse joalo.

Mokete ona o bile teng ka ho nka karolo ha Ramotse oa mehleng oa Maseru, Relebohile Sechache, Morena oa Sebaka sa Ha Raboshabane, Mpiti Maama, litsebi tsa nalane, litho tsa sechaba hammoho le bana ba likolo tsa Mathomo tsa Ha Khoeli le Nkoeng.

Mokete oa bochaba oa Raboshabane o qalile ho ketekoa ka selemo sa 2022, 'me o ntse o tsoela pele ho tšoaroa selemo le selemo ka sepheo sa ho

boloka nalane, bochaba le ho matlafatsa poelano le bonngoe har'a sechaba.



# Ba betsa khiro ea metsofe ka majoe

## Nthabeleng Seithleko

**M**olula-Setulo oa Komiti ea Bacha ba Lekhotla la Puso ea Sechaba(DC) Pheello Sehlabaka, o nyatsitse qeto ea 'muso ea ho khutlisetsoa mosebetsing ha mapolesa a seng a fihletse lilemo tsa ho tlohela mosebetsi, a re mohato oo o hatikela molao 'me o fokotsa menyetla ea mesebetsi bakeng sa bacha. O boletse tsena, puisanong le Koranta ena ka la 2 Loetse monongoaha.

Sehlabaka o re ho khutlisetsoa mapolesa mosebetsing kamor'a hore a fihlele lilemo tsa phomolo ho hlalisa lipotso tse tebileng mabapi le tlhompheo ea melao le melaoana e laolang tšebeliso ea sechaba. O re taba ena e tšoenya le ho feta hobane e etsahala nakong eo 'muso o phatlalaltseng hore tlhokeho ea mesebetsi har'a bacha ke koluoa ea naha.

"Ha 'muso o re tlhokahalo ea mesebetsi har'a bacha ke koluoa, re lebeletse hore liqeto tsa 'muso li bontše seo. Re batla hore menyetla e buleloe bacha, eseng hore batho ba seng ba fihletse lilemo tsa phomolo ba khutlisetsoe mosebetsing," ho boletse Sehlabaka.



O re Lesotho le na le bacha ba bangata ba rutehileng le ba nang le litsebo, empa ba qeta lilemo ba batla menyetla ea ho sebetsoa.

Sehlabaka o re haeba sepolesa se tobane le khaello ea basebetsi, tharollo ha ea lokela ho ba ho khutlisetsa batho ba seng ba phomotse mosebetsing feela, empa 'muso o lokela ho fana ka menyetla e mecha ea khiro.

Maikutlo ana a tla kamor'a 'moka oa Sepolesa sa Lesotho o neng o tšoeroe bekeng e fetileng, moo ho neng ho tšohloa taba ea polokeho le khaello ea basebetsi ka lebaka la mapolesa a tlohelang tše-

beletso.

Mookameli oa Sepolesa sa Lesotho, Adv. Borotho Matsoso o bontšitse hore ho tloha ha mapolesa a ea phomolong ho baka tahlehelo ea litsebo le boiphihlelo, ho siea likheo nakong eo sepolesa se seng se ntse se haelloa ke basebetsi. O itse mosebetsi oa sepolesa o mongata, athe palo e tlase ea mapolesa e ka fokolisa tšebetso ea sepolesa.

SACP 'Matšepang Ramarikoana le eena o bontšitse hore Sepolesa sa Lesotho esale se tobane le khaello ea lichelete bakeng sa ho hira mapolesa a macha. Ho ea ka Ramarikoana, ho tloha selemong sa

lichelete sa 2022/23, sepolesa se hirile mapolesa a 297.

O boetse a re lipakeng tsa 2022 le 2026, sepolesa se lahlehetsoe ke mapolesa a 474 ka mabaka a fapaneng, ho kenyeletsa ho ea phomolong, ho tlohela mosebetsi, lefu le ho lelekoa mosebetsing. Ho bao, o itse ba 280 ba ile phomolong. Ho ea ka eena, tahlehelo ena ea basebetsi e thefula tšebetso ea sepolesa.

O itse ho reriloe khiro e ncha ea mapolesa, moo mapolesa a seng a tsofetse a tla sebelisoa ho koetlisa a macha. Ho ea ka morero ona, ho lokolloa ha mapolesa a fihletseng lilemo tsa phomolo ho tla emisoa ho tloha 2026 ho isa 2029, ka sepheo sa hore a thuse ho rupela basebetsi ba bacha, 'me mokhoa ona o lebelletsoe ho fela ka Phupjane 2029.

Sehlabaka o re leha a utloisisa hore sepolesa se hloka basebetsi ba nang le boiphihlelo, ha hoa lokela hore tharollo e be ho koala menyetla ea bacha. O re haeba boiphihlelo ba mapolesa a seng a tlohetse mosebetsi bo ntse bo hlokahalala, 'muso o ka fumana mekhoe e meng ea ho sebelisa boiphihlelo boo ntle le ho thibela khiro ea bacha.

O boetse a re qeto ena e ka ama le tšebetso ea mapolesa a

ntseng a le mosebetsing, kaha ba bang ba bona ba ka beng ba fuoa menyetla ea ho nyolloa maamong a phahameng.

Lekhotla la Bacha la Puso ea Sechaba le lona le hlalishitse matšoenyeho a tšoanang, le re 'muso o lokela ho hlalloba bocha qeto ea ho khutlisetsa mapolesa a seng a phomotse mosebetsing. Lekhotla le re batho ba seng ba fihletse lilemo tsa phomolo ba lokela ho fuoa monyetla oa ho phomola ka seriti, ha bacha ba nang le thuto le litsebo ba fuoa menyetla ea ho sebeletsa naha. Le boetse le kopile 'muso ho hlakisa hore na lichelete tsa ho lefa mapolesa a khutlisetsoang mosebetsing li tsoa hokae, haholo haeba batho bao ba ne ba se karolo ea likhakanyo tsa lichelete tsa pele.

Ba re haeba ho fumaneha lichelete tse ncha bakeng sa ho lefa basebetsi ba seng ba phomotse, hobaneng lichelete tseo li sa sebelisoa ho bula menyetla e mengata ea mesebetsi bakeng sa bacha. Le khothalelitse 'muso ho hlomphe melao ea phomolo, ho nyolla mapolesa a ntseng a le tšebelatsong, le ho etsa khiro e ncha ho arabela khaello ea basebetsi.

Sehlabaka o re taba ena ha se feela taba ea sepolesa, empa ke taba e amang bokamoso ba bacha le tšepo eo sechaba se nang le eona ho 'muso. O re ha 'Muso o se o bitsitse tlhokeho ea mesebetsi har'a bacha koluoa ea naha, liqeto tsa khiro li lokela ho bontša boitlamo bo hlakileng ba ho sebetsoa le koluoa eo. "Musu o lokela ho hira bacha ba bangata, eseng ho fokotsa menyetla ea bona. Re batla liketso tse bontšang hore phatlalatso ea hore tlhokeho ea mesebetsi ke koluoa ha se mantsoe feela," ho boletse Sehlabaka.

Ho sa le joalo, litaba tse hlalhelletseng ke hore Tona-Kholo Sam Matekane o laetse Mookameli oa Sepolesa ho emisa khiro-bocha ea mapolesa a neng a lokela ho ea phomolong. Litaba li supa ha Matekane a fane ka taelo ena pele a ea leetong 'mokeng oa linaha tsa Afrika, Luanda naheng ea Angola.

Qeto ena e latela hore Mookameli oa Sepolesa Adv. Borotho Matsoso a phatlalletse sechaba ha a le morerong oa hira bocha litho tsa sepolesa tse neng li le matsatsing a phomolo pele li hlile li beha meja fatše. Matsoso o ne a re o etsa sena ho matlafatsa sepolesa kaha se e-na le likheo ho latela hore ha sea hira ka lilemo tse ngata.

Litaba tse hlalhellang ke hore Matekane o tlas'a khatello ho tsoa ho bacha ba RFP, ba llang ka hore qeto ena e thulana le phatlalatso ea 'muso ea hore ho na le kuluoa oa tlhokeho ea mesebetsi har'a bacha.

**Our Shirts**

**Mazenod Tailoring**  
Prepare good People for The Lord

**Timeless Designs. Tailored Confidence.**

**Wear your power**

**Place your order**

TEL: +266 28 350 814  
WhatsApp: +266 50757585  
Email: [tailoring@mazenodprinting.co.ls](mailto:tailoring@mazenodprinting.co.ls)  
Facebook as Mazenod Tailoring

PHYSICAL ADDRESS:  
MAZENOD, HA PAKI  
OPPOSITE POST OFFICE

# Ba tlotlisa khakolo ea buka

**Nthabeleng Seithleko**

**B**acha ba tikoloho ea Hlotse seterekeng sa Leribe ba tlotlisitse ketekelelo ea ho khakoloa ha buka e ncha e bitsoang Moleboheng, ka ho kenela litlholisano ka mokhoa oa ho ngola lihlahlobo tse buang ka bohlokoa le molaetsa o fuperoeng ke buka ena. Ketekelo ena e bile Setsing sa Likhoebo sa BEDCO, Hlotse ka la 30 Loetse monongoaha, moo bacha ba bileng ba bolelloa ka nalane ea sengoli sa buka ena Monghali Kabelo C. Madona le ho hlahlella bacha ka malebela mabapi le seo ba batlang ho ba sona.

Hone ho boetse ho ena le sebui sa bohlokoa e leng Monghali Sejela Mekeleli ea ileng a bua ka nalane ea bophelo ba sengoli sa buka, e leng Monghali Kabelo Madona le litaba tsa bongoli ba libuka kahare ho Naha ea Lesotho. O boletse hore pale ea bongoli ba libuka tsa Sesotho leha e-sa phatlaletsoe Basotho ba tloha hole haholo ka eona. A re lilemong tse ngata tse fetileng har'a lingoli tse ngata tseo Setereke sa Leribe se bileng le tsona ke Monghali Thomas Mofolo ea ngotseng libuka tse ngata, empa har'a tsona e ileng ea tuma le ho ratoa haholo ke Chaka.

A re lilemong tsa morao tjena ba bile le lehlohonolo la ho boela ba fumana letsoalloa la setereke sena eo e leng sengoli, Mongali Kabelo Madona ea ngotseng buka e monate e fetotseng bophelo ba Basotho e bitsoang Moleboheng. A re buka ena e oela mofuteng oa lingoloe tsa lipale tse seng tsa 'nete feela molaetsa oa eona it'setlehile ka lintho tsa 'nete tsa bophelo ba letsatsi ka leng. "Mohlomong ho ena le batho ba 'nete kahare ho eona a mpa a ba fetotse mabitso." A re sengoli sa buka se phetse libakeng tse 'maloa tseo a qetelletseng a ngotse buka ena e fetotseng bophelo ba Basotho, e bileng e ngotsoeng ka puo e mathe maloli ea Sesotho.

Sengoli Monghali Kabelo Madona o ile a lokolisa pale e bohloko ea kholo ea hae, moo a ileng a bont'sa hore h'a ka a hola hamonate joaloka ka bana ba bang ba Basotho ka lebaka bo fumana le tlala ka lapeng labo, 'me o ne a phela ka ho fumana lithuso malapeng a mang. A re ka lebaka la ho

ba lerato la thuto le ho sebetse ka thata ka matsoho o ile a atleha.

A re lebitso la buka ena Moleboheng ke la ngoana eo a neng a mo rata haholo, 'me hajoale buka ena e phuthetseng manoni a puo ea Sesotho a hlalositsoeng ka tsela e bonolo ke khatiso ea bobeli, 'me ba ntse ba sebetse ka thata hore e tle e qetelle e sebelisoa le likolong ho latela monate le bohlokoa ba eona.

A re ho latela bophelo boo a bo phetseng o ile a hlokomela hore a se ke a etsa lithuto tsa Sekhooa feela, kaha e le tsona tseo a neng a hlile a lipasa hantle le ho ba sengoli sa libuka, empa a etsa le tsena tsa ho tataisa bacha ka seo ba batlang ho ba sona ha ba qeta ho phethela lithuto tsa bona likolong tse kholo le tse phahameng.

A re ka mosebetsi ona oa ho tataisa bacha hore ba nepe hantle seo ba batlang, ho ba sona ba se ba nt'sitse likoankoetla tsa bana ba Basotho, ba seng ba fumane mangolo a phahameng haholo a thuto le mesebetsi e meholo kahare le kantle ho naha. A re mosebetsing ona ba boetse ba kenyelletsitse le hore ha ba qeta ho thusa mocha ho etsa khetho e nepahetseng e tla mo tsoalla bokamoso, ba boetse ba motataisa ho fihlela a ba a il'o tsoa khoeleng. "Ha re mo thusa feela ka tataiso ebe hare qeta re ea monyahlatsa. Re etsa bonnete ba hore o ba lekatleho bophelong ba hae." Ke eena eo.

A qetella ka hore morero oa hae ke ho kenya bacha moea oa ho atleha bophelong. "Re int'sa sehlabelo sa hore hao qeta sekolong rona o re hlakisetse hore na o batla ho etsa lithuto li fe. Ha o qeta re o t'sehetsa ho fihlela o fihlela seo o se

labalabelang bophelong ba hao." Ke Madona eo.

Lebitsong la bacha ba ileng ba thusoa ke Monghali Madona, e leng Motebang Motsamai o thoholelitse le ho leboha ka mokhoa o khethetse Monghali Kabelo Madona, ka ho tlisa phetoho e kholo bophelong ba hae. O re h'a qeta ho phethela lithuto tsa hae tsa Sehlopha sa Bosupa o ile a sitoa ho ea sekolong se phahameng ka lebaka la tl-

hokahalo ea lichelete ka lapeng, hoo a ileng a tlameha ho ea pheta sehlopha seo hape.

A re leha taba ena e ile ea mo utloisa bohloko haholo selemong se hlahlamang o ile a fumana lithuso, 'me ea re h'a etsa 'Form B', Monghali Madona o ile a mo thusa e seng feela ka ho mo isa sekolong, empa le ka ho mo tataisa hore a fihlele seo a batlang ho ba sona. Ka hona a leboha Mongh-

ali Madona, kaha o bile a phethela lithuto tsa hae ka NUL tlasa leihlo tse nchocho la hae.

A hlokomelisa bacha hore leha

ba kopana le liqholotso ba se ke ba nyahama, empa li tlameha hore li ba fe matla le ho ba ruta ho sebetse ka thata bophelong ba bona. "Ho sebetse ka thata ho ile ha nthuta hore ha ke kopana le mathata ke se ke ka sisinyeha." O boletse joalo.

## Basali le khotso ke liea thoteng

**Nthabeleng Seithleko**

**B**asali le khotso ke matla a tlatsanang a bohlokoa ho aheng sechaba se tsitsitseng le se nang le botsitsi.

Ona e bile molaetsa oa mantlha o fanoeng ke 'Malejaka Letooane, Mollala-Setulo oa International Women's Peace Group (IWPG), ka la 30 Phato monongoaha. Letooane o totobalitse karolo e ikhethang eo basali ba e phethang sechabeng, a re karolo eo e tsamaisana ka tlhaho le ho haheng khotso lefatšeng.

O itse basali ke bona ba atisang ho jara moralo o moholo nakong ea likhohlano le lintoa, ka hona ho bohlokoa hore ba be le seabo le mafolofolo mererong ea khaho ea khotso. A boela a totobatsa hore ho nka karolo ha bona ke tokelo e sirelelitsoeng ke molao oa motheo.

"Khotso le basali lia tlatsana. Re ke ke ra fihlela khotso ea 'nete le e tsoarellang ntle le ho kenyelletsa basali, ho matlafatsa karolo ea bona le ho sebelisa boetapele ba bona. Ha u fa mosali thuto ka khotso, u sireletsa bokamoso ba sechaba sohle," ho

boletse Letooane.

Puo ena e bile sehloholo sa letoto la mesebetsi e neng e hlophisitsoe khoeling eohle ea Phato. Letšolo lena le ne le shebane le ho phahamisa tlhokomeliso ka bobuelli ba khotso bo etelletsoeng pele ke basali, ntšetsopele ea sechaba, hammoho le tlhokahalo e potlakileng ea melao le litumellano tsa machaba tse ka thusang ho thibela lintoa lefatšeng.

IWPG Lesotho e tsoela pele ka bobuelli ba khotso bo thehiloeng sechabeng ka mananeo a fapakaneng.

Har'a o na ke IWPG Plant Peace Project, e kopanyang tlhokomelo ea tikoloho le thuto ka khotso.

Lenaneo le leng ke Peace Leadership Training Education (PLTE), le reretsoeng ho matlafatsa basali ka tsebo le bokhoni ba ho ba mangosa a khotso metseng ea bona.

Khoeli ea Basali ba Afrika e ketekoa selemo le selemo ka khoeli ea Phato ho hlompheha nalane ea Leeto la Basali la 1956 Afrika Boroa, hammoho le ho khothaletsa tekatekano ea bong le ho matlafatsa karolo ea basali kontinenteng ea Afrika.



# 'Tlhokahalo ea motlakase e khina lintlafatso'

**Tšeliso Thakholi**

**T**ona - Kholo Samuel Matekane o re tlhokahalo ea boemo bo tsitsitseng ba motlakase kahare ho teropo ea Semonkong bokhinne lintlafatso. Ka

hoko tsa rona kahare ho naha.

O re phehlo ea motlakase ke e 'ngoe ea litšiea tse matla tsoe 'muso o tla lisebelisa ho aha moruo o tlokomang le ho abelanoa ke bohle. A bontša hore ho tliil'o sebelisoa chelete e kaalo ka M78Millione bakeng sa khaho ea morero ona, 'me hao se o phethetsoe tebello ke hore litšebelet-

la liphoofole le temo ea lijalo tse kang litapole." O boletse joalo a bile a tiisa hore khaho ea setsi sena e lokela hore e ntlafatsa teropo ea Semonkong, e holise moruo oa eona le ntlafatsa bophelo ba sechaba.

Morena oa Sehlooho oa Matsieng, Morena Seeiso Bereng Seeiso o thoholelitse le ho ananela tšehetso e matla eo Ban-

ba tšehelitse sechaba sa Basotho ha se ena le mathata a lichelete.

A supa hore sena ke pontšo ea hore ke metsoalle ea sebele ea sechaba sa Basotho. "Hona le motsoalle eo e tla ba motsoalle ha letsatsi le chabile, empa ha pula le sefako lina oa o baleha. Empa kajeno ho oa bonahala Banka ea Lefatše nakong ea mathata

so e tsamaea ka maoto a mararo e leng motlakase, tsela le metsi. Ka hona a kopela sechaba sa hae ho ntlafatsoa litsela tse kopanyang metse e ka maloting.

Letona la Matla le Lirafshoang, Mohlomphehi Lejone Mpotjoane o itse Lekala la habo le amohe-tse thomo la ho tla matlafatsa moruo oa Naha ea Lesotho ka khokelo ea motlakase. O re seo e saleng se etsahala sa hore e be motlakase o lula o khaoha nako le nako ke ho bolela hore sena se amme moruo haholo. A re phehlo ena ea motlakase e tliil'o ba teng le khokelo ea malapa sepheo ke hore moruo oa Maletsunyane o phele ka linako tsohle.

A re sepheo sa Lekala la habo ke ho fehla motlakase ohle oo bao hlohang e le Naha ea Lesotho, re be re fepele le linaha tseo re hahisaneng le tsona le kenyetse Naha ea Lesotho chelete ka ho fehla motlakase. A qetella ka hore morero ona o tliil'o tseba ho fokot-sa litjeo tsa motlakase o tsoang kante ho naha le litheko tsa ona. "Ke etsa boitlamo hore ka Lekala la heso le likampani tseo ke sebetsang le tsona, re tliil'o bona hore mosebetsi ona reo phetha ka nako eo re e fuoeng. Re boetse re tliil'o bona hore metse le eona e hokeloa motlakase. "Ke eena eo.

hona boteng ba morero oa phehlo ea motlakase bo tliil'o thusa hore mae-mo ana e be pale ea maobane. O buile tsena h'a thakhola ka molao mosebetsi oa khaho ea Setsi sa phehlo ea motlakase ka metsi le letsatsi le khaho ea poloko ea motlakase, tšebeletsong e bileng Maletsunyane tikolohong ea Semonkong mafelong a beke a tsoa feta.

Tona-Kholo o boletse hore maemo a na a ntšoentse 'muso haholo nako e telele, kaha morero oa 'muso ke hona hore Mosotho ka mong o fumana litšebeletso tsa mantlha tse kenyeletsang motlakase. "Ra boela ra itlamba hore sena re ka se fihlela ka selemo sa 2030, 'me re tla sebetsa ka thata ho phethahatsa tšepiso ena ea rona." A rialo a bile a eketsa ka hore re ke ke ra tseba ho aha moruo o tsitsitseng ha feela re sa hlahisi motlakase o lekaneng litl-

so lintlafale, metseng, malapeng le sechabeng ka kakaretso. "Sena e tla akofisa khoho ea moruo ka Semonko e le seba-ka sa bohahlaoli, leruo

ka ea Lefatše, e bontšitseng bakang sa khaho ea Setsi sena molemong oa khoho le ntšetso pele ea sechaba. A totobatsa hore ka mehla ba lula

a lichelete re bona hore setsoalle seno se ntse se le teng. Ka hona rea leb-o-ha."

A re taba ea bohlokoa ke hore ntlafalo le ntlafat-





# TSA KEREKE

## Kopano e hlahisa bakokoti

### Nthabeleng Seithleko

**E**bile thabo ho bakriste ba kereke e katholike ea St. Leo, Ha Makhoathi ha ba koala khoeli ea mosali oa Moafrika le ho amohela tlhahiso ea bakokoti ho hlaha kopanong ea Pelo e Tlotlehang ea Jesu, ka la 30 Phato monongoaha. Kopano ea Pelo e Tlotlehang ea Jesu e hlahisitse

ba lokela ho hlonephua, ho sireletsoa, ho baballoa le ho eloa hloko. Matla a bona a lokela ho bonahala kholong ea tumelo, kahoo ho bohlokoa hore bo-ntate ba bontše kananelo le ka liketso eseng ka lipuo feela.

H'a phethela o hlahositse hore kananelo ea basali ha e lokela ho bonahala ka khoeli ea Phato feela, empa e bonahale nako eohle. Molaetsa oa hae ho basali bohle ba kopano ea Pelo e Tlotlehang ea Jesu St. Leo,

moo Mookameli oa Lekhotlana St. Leo, John Hloele ebile e le setho sa Kopano ea Pelo e Tlotlehang ea Jesu, a hlahositse hore khoeli ea mosali oa Moafrika e bohlokoa bophelong ba basali le bona. O re hoja e se ka basali ba kabe ba le sieo. "Basali ba tsamaee ba i'lo fetoha letsoai malapeng le metseng ea bona, ke lona le ka fetolang polelo e reng motse oo o lutse botleng, empa metsi oa ona a ea baba," a hlalosa joana.



bakokoti ba bahlano, bao eseng e le litho ka botlalo, kamor'a ho apesoa boikhutsona ba selemo bo neng bo tšoaretsoe Mishoneng oa Lorretto, ka la 17 ho isa la 19 Phupu monongoaha.

Mookameli oa Kopano ea Pelo e Tlotlehang ea Jesu St. Leo, Mokone Edwin Khokane, o hlahositse hore o motlotlo ho bona hore kopano e ntse e hola, haholo batho ba ikemisetseng ho tšelisa Pelo ea Jesu. A re tlhahiso ea bakokoti ke pontšo ea kholo ea kereke le bokamoso ba eona, 'me bo teng ba bona e se e le keketseho ea khaso ea Evangeli. Ke litho the hlano tse neng li hlalisoa, 'me mosebetsi ona o etsa selemo le selemo ho ba hlahisa kapel'a phutheho e le pontšo ea kananelo ho kereke.

A re kaha mosebetsi ona o entsoe nakong eo ho koaloang khoeli ea Mosali oa Moafrika, "basali bohle ba tsebe hore re ea ba rata, re ea ba utloa, re ea ba ananela" a hlalosa joana. O tsoetsepele hore basali ke karolo e kholo e matla,

ke hore ebe basali ba matla thapelong, ba ahang eseng ba heletsang, ba phahamisang ba bang eseng ba banyenyefatsang hore qetellong bohle atlehe ho fihlela seo ba leng sona kahar'a kopano.

Motlatsi oa Mongoli oa Kopano ea Pelo e Tlotlehang ea Jesu St. Leo, Maria Goretti Khongoana, o hlahositse hore khoeli ena e hopotsa basali bohle hore ba lokela ho ithokomela, ho ithompha, ho ikemela le ho hlomphe ba bang. A re moo basali ba kopaneng matla a bona a ka nako tsohle a bonahala ka liket-sahalo tse tšoarehang, 'me ho bohlokoa hore bohle ba hlomphe seo ba leng sona

Ho basali kopanong ea Pelo e Tlotlehang ea Jesu, o hlahositse hore ke moo basali ba fumanang khotso 'me le teng, ba lokela ho tšoarana ka matsoho, hore kopano e hole, ho phelisa-na ka lerato le bonngoe. O bile a lakaletsa basali bohle khoeli e monate ea mosali oa Moafrika.

Ke hona mosebetsing ona,

O re basali ba matla, 'me ha ba ka eleloa matla a bona, Lesotho ho ka ba le tona-kholo le matona a basali, hobane ka nako eo basali bao ba ile ba lemoha matla a bona e le ho khutsa. Ka lebaka leo basali ba tsebe ba matla, ba bohlokoa ba ka fetola lefatše leo re phalang ho lona hona joale. "Re le bo-ntate re ea le rata," a phethela joana.

Ka lehlakoreng le leng, Thapelo Samuel Tipane eo eleng setho sa kopano ea Pelo e Tlotlehang ea Jesu St. Leo, lebitsong la bo-ntate ba kopano ena, o ile a lakaletsa basali bohle let-satsi le monate le hore bao ba tsebe hore ba bohlokoa.

Ke litho tse hlano tse hlahisitsoeng kahar'a kereke, li bile tsa fana ka matšela-nokana ho moprista ho bontša kananelo ea mosebetsi ona. Ke hona ketekelong ena moo kopano ea Pelo e Tlotlehang ea Jesu St. Leo e bileng ea fana ka limpho ho baitlami ba phelang sebakeng sena e le karolo ea e meng ea mesebetsi ea boapostola.

## 2025-2026 SELEMO A

### SONTAHA SA 23 HAR'A SELEMO



Ezekiel 33:7-9

Pesalema 94

Ba-Roma 13:8-10

Matheus 18:15-20

### Khothatso



### Ho hlokomelisa ba bang

Ho ka be ho le bonolo ho rata bana babo rona, hoja e ne e le batho ba ratehang, ba nang le makhabane 'ohle. Empa ho thata ho ba rata ha e le mona ba na le likhaello tse ling le mefokolo e itseng, hobane molao oa lerato le boena o re tlama ho ba thusa, e seng ka lithapelo le mehlala e metle feela, empa esita le ka likeletso, lithokomeliso le likhalemelo. Rona re tseba kamoo ho leng thata kateng ho amohela likeletso tsa ba bang, joale re ka itekanyatsa bothata ba ho eletsa ba bang le ho ba khalemela ha ba fositse. Lithuto tsa kajeno li re hlahosetsa mokhoa oa ho phetha mosebetsi ona o thata oa lerato la boena.

Thutong ea pele moprofeta Ezekiele o re bontša tlhokomeliso eo Morena Molimo a e nehang baprofeta ba hae. Baprofeta ke batho ba khethiloeng ke Molimo har'a sechaba hore ba fetise melaetsa ea hae ho batho ba bang. Ke balebeli ba sechaba, 'me hangata mosebetsi oa bona o thata, hobane melaetsa ena ea Molimo ba tlamehile ho e fetisetsa ho batho, leha e le e bohloko e seng monate. Ha ba sa etse joalo, 'me batho ba khopo ba shoela libeng tsa bona. Baprofeta ba na le kabelo libeng tsa bona. Haeba baprofeta ba phetha litšoanelo tsa bona, empa batho ba khopo ba hana ho sokoloha le ho khutlela ho Morena Molimo 'me ba shoela libeng tsa bona, baprofeta ba tla talingoa ba se molato, kahobane ba phethile tšoanelo ea bona.

Re le bakriste, kaofela ha rona re baprofeta ba Morena Molimo, re baemeli ba hae. Re fuoe tokelo le tšoanelo ea ho khantšetsa batho bohle ka leseli la tumelo ea ona. Re tlamehile ho thusa bana babo rona ka mehlala e metle le ka likeletso tse etsoang ka lerato.

Batho ba pele ba nang le boikarabello bo joalo ke batsoali. Ba tšoaetse ho eleloa hore bana ba bona ba tsoa ho Morena Molimo 'me ba lokela ho khutlela ho eena. Ho malimabe batsoali ba fanang ka mehlala e mebe ea bana ba bona, hobane ba tla ba le boikarabello holim'a libe tsa bona le tsa bana ba bona.

Ke 'nete hore mehleng ea kajeno, bacha ha ba sana hlomphe ea litaba tsa Molimo 'me ha ba tsotelle lehlohonolo la bona le sa feleng. Empa bana ba holisitsoang malapeng a ithlompheang 'me a mamelang melao ea Molimo, ba holisoang ke batsoali bao e leng bakriste ba sebele, bana bana ba tla boloka hlomphe ea Molimo le tumelo ea sekriste oa batsoali ba bona ba ba rutileng eona.

Boikarabello ba batsoali holim'a bophelo bo sa feleng bo lehlohonolo ba bana ba bona bo bohloko; ha bana ba bona ba sa fenyelle leholimong ka molato oa bona, le bona batsoali ba kotsing e kholo. Seo re se bolelang ka batsoali, re se bolela le ka baemeli ba Hlatsuo ba tšoaetse hore sebelisana le batsoali ho holisetsa bana tšabong, leratong le tšebeletsong ea Morena Molimo. Ho joalo le ho litichere tse rutang bana likolong. Litichere ke batlatsi ba batsoali; ba tšoaetse ho bontša bana tsela e nepahetseng ea bophelo le ho ba khalemela ha ba fositse, e le hore kholiso ea bona e be e lumellanang le tumelo ea bona.

Ka ntle ho batsoali, baemeli ba Hlatsuo le litichere, ba nang le boikarabello bo khethelileng holim'a bana ke bakriste bohle. Ba tšoaetse ho thusa bana babo rona ka lerato, ka thapelo, ka mehlala le ka likeletso tse ntle, esita le ka khalemelo ha ba hopola hore khalemelo ena e etsoang ka lerato le tibileng e tla amoheloa hantle.

Ho ho le joalo, rona bakriste re balebeli ba bana babo rona 'me re tšoaetse ho ba hlokomelisa ha kotsi e le teng e le lebele. Re ba hlokomelise esita ha ba hana likeletso tsa rona; re ba eletse re sa khathale. Ezakiele e bile moprofeta ka lilemo tse mashome a mabeli a metso e meraro le Jeremia ka lilemo tse mashome a mahlano. Re se ke ra lebala hore mokhoa o motle oa ho phetha tšoanelo ena e thata ke ho khothaletsa botle. Ho e-na le ho emela ho bona bobbe bo etsoang ka ba bang le ho ba khalema, re hlokomelise ntho tse ntle tseo ba li etsang, 'me re phakise ho ba lebohela le ho ba khothaletsa ho etsa hantle ho feta. Likhothaletso li amoheloa hantle ho feta likhalemelo.

Morena Molimo ea matla 'ohle a ka fetola pelo tsa batho e le eena, empa o hlonepa bolokolohi ba rona. Ho feta moo, o rata hore re kenye letsoho mosebetsing ona oa ho pholosa meea. Ha re filha leholimong, re tla makalla ho bona hore pholoho ea rona e itšetlehile ka lerato la rona le boiteko ba rona ba ho thusa ba bang ho finyella leholimong.

Evangeli ea kajeno e tiisa seo re se utloileng ho moprofeta Ezakiele: re balebeli ba bana babo rona, re na le boikarabello holim'a bona. Ka ho ba behela mehlala e metle le ka ho thusa tseleng ea bophelo ba sekriste, ka ho ba khothaletsa, ka ho ba eletsa le ka ho ba khalemela ka mohlomong, re phetha molao oa lerato la boena.

Le rona re baetsalibe, rea fosa, re na le likhaello le mefokolo. Ka bomalimabe ho bonolo ho feta ho bona liphoso tsa ba bang ho e-na le ho bona tsa rona. Re tloaetse ho ahlola ba bang, athe Kriste o itse re se ke ra ahloa. Ka baka leo, e mong le e mong oa rona o tšoaetse ho bopa maikutlo a hae le pelo ea hae, hore a amohela ka teboho likeletso le likhalemelo tse tsoang ho ba bang. Kriste o qetella ka ho re khothaletsa ho rapela hammoho, hobane moo re rapelang hammoho, o teng har'a rona, 'me leseli la hae le re thusa ho bontša likhaello tsa rona le ho amohela likeletso le likhalemelo, hobane li etselitsoe molemo oa rona, bakeng la bophelo bo sa feleng.

## Bahalaleli har'a Beke

|    |        |        |
|----|--------|--------|
| 7  | Loetse | Cloud  |
| 8  | Loetse | Adrian |
| 9  | Loetse | Omer   |
| 10 | Loetse | Finian |
| 11 | Loetse | Bodo   |
| 12 | Loetse | Ailbhe |

# Lihlopha li roalla le sa sele

Tšeliso Thakholi

J oalokaha selemo se secha sa lipapali sa 2026/2027 se qalile, 'me lihlopha li kene bekeng ea bobeli ea Mokhahlelo oa pele oa Liki, lihlopha tse kholo tsa papali ea bolo ea maoto tsa Vodacom Premier League li ntse li isana holimo le tlaase mabaleng a fapakaneng, ho bonahala ha tse ling li se li qalile ho roalla le sa sele, ha tse ling li e-s'o ikatele hantle ho lekana. Athe tse sa ikatelang e se e le ha li qalile ho salla mosalla ruri!

Sehlopha sa Matlama 'Tse Putsoa' se qalileng Liki e Kholo ka sekhahla se seholo, seo e leng sona se lihulang pele lokong ka ho bokeletsa lintlha-khoho tse tšeletseng ka mokotleng, se boetse sa ntlafatsa maemo a sona ka ho tlabola LMPS ka phafa ea 4-1 papaling e matla haholo e bileng lebaleng la Bambatha. Bompoli ba bolo Lesotho e leng Lijabatho ea Morija e maemong a bobeli kamor'a ho pitikisa mahe le Majantja(0-0).

Athe sehlopha sa Manon-



yane se bonahalang se qalile lipapali tsa sona hantle haholo selemong sena, se ile sa makatsa barati le batšehetsi ba bangata ba bolo ea maoto ha se ne se tlonlolla le ho hobosa Lifo-fane ka ho se pola ka phafa ea 4-0, se ba se nyolohela maemong a boraro lokong. Haele sehlopha sa Members se balehile maemong a ho qetela lokong sa nyolohela boemong ba bo-12 kamor'a ho bapala ka seahlolo sa 0-0 papaling e neng e le

bolutu haholo, e bileng lebaleng la Setsi sa Tlhabollo ea Batšoarua ka Sontaha.

Ho feta mona tse ling tse ileng tsa bapala ke moo bompoli ba mehleng ba Liki e Kholo, Lioli e hlotse Linare ka 3-2, Bantu ea iphetela bolacha ho LCS ka 2-1. Machokha e neng e amohetse LUFC ea boela ea lahleloa ke papali ea eona ea bobeli ha e ne e hloloa ka 1-0. Haele lihlopha tse peli tse ncha Liking, Mzamane le Villa li ile tsa nonyana matla

'me Mzamane ea ikholletse ho Villa ka ho e shashara 1-0 kamor'a hore e shapuo e 8-0 ke Lijabatho bekeng e fetileng.

Haele bekeng ea boraro ea Liki e Kholo ka Moqebelo sehlopha sa Lifofane se tla amohela sa Matlama Botha-Bothe, LMPS e botsane li-potso le Members lebaleng la PTC, Lioli e bapale le Mzamane. Ha e le papali ea Manonyane le Lijabatho ha ena ho tsoela pele, kaha Lijabatho e tli'l'o bapala leo-

to la eona la pele la litlholisano tsa CAF Champions League mafelong ana a beke, le sehlopha sa CFFA ea Naha ea Madagascar ka la 5 Loetse ebe leoto la bobeli le tla ba ka la 11 Loetse monongoaha.

Letsatsing la Sontaha ho tla bapala lipapali tse tharo e leng moo LUFC e tla koebana le Majantja, Bantu e bapale le LDF ha Linare e seng e ntse ena le maqeba a phafa a mabeli.

## O ba siela pina ea lekunutu

Tšeliso Thakholi

S ebini se tseba-halang haholo sa 'mino oa 'Country', Dolly Parton(80) ea seng a iketse ho 'Mopi oa hae kamor'a bokulo ba nako e khutšoanyane ba lefu la mofetše, o phomolitsoe borokong ba hae ba ho qetela haufi le molekane oa hae Carl Dean(60),motseng o khutsitseng oa Mausoleum, Nashville ka la 28 Phato monongoaha, moo a sietseng barati le balateli ba hae lefatše ka bophara pina ea lekunutu e e-s'ong ho bapaloe ho hang, e bitsoang 'My place in history.'

Dolly Parton ea ileng a ngola pina ena nako e se kae pele ho lefu la hae, a ba a e notlella ka thata kahare ho lebokose la litoro tsa hae tsa 'mino,le bitsoang Dolly-woods Dreammore Resort le bolokiloeng motseng oa hae o Pigeon Forge tikolohong ea Tennessee,o siile litaelo tsa hore pina eo ea lekunutu e tle e bapaloe barati le balateli ba hae ka la 19 Pherekhong 2045.

O tlaehoa a boetse a siile a boleletse balateli ba hae hore h'a qala ho ngola pina ena e ne e hlile e sena matla a maholo a ho hapa pelo ea hae, empa ea re ha nako e ntse e ea a utloa molaetsa oa eona o kena ka sekhahla se seholo pelong ea hae, bosiu h'a robetse a tsoha a e ngola. Hang ho ba a qete ho e ngola o ile a bolella balateli ba hae hore "haeba mang kapa mang oa lona o tla be a ntse a le teng ha ho buloa lebokose lena ka 2045, ke tšepa hore o tla thabela manoni le monate o phuthetsoeng ke pina ena."

Dolly Parton o hlalile ka la 19 Pherekhong 1946 ke ka lebaka lena a laetseng hore pina eo e tle e binoe ka la 19 Pherekhong 2045 e le ha tla be a etsa lilemo tse 99 haeba a ne a ntse a phela. Khalala ena ea 'mino e sithabelitseng barati ba bangata ba 'mino oa 'Country' lipelo, o qalile talenta ea hae ea 'mino a le lilemo li 13, 'me a hatisa pina ea hae ea pele e bitsoang 'Pappy love.'

Khalala ena e qetile boph-

elo ba hae le mosebetsi oa hae a tliša thabo, tšehetso, tšepo le botšepahi ho tsohle tseo a neng a li etsa. O ne a tšabana le balateli ba hae haholo a bile a khothatsa le ho matlafatsa barati ka molaetsa o matla oa lipina tsa hae. Har'a lipina tse ngata tse monate tseo a tlang ho

hopoloa ka tsona ke ileng ea nka lefatše lekhara-khara e bitsoang 'Just because I am a woman ea 1968 le I will always love you.'

Naleli ena ea 'mino oa 'country' ea tlahehang a atlehile ka hofetisisa, o hloka-hala a ena le li-album tse 49 le lipina tse ngotsoeng

ka bonngoe tse ka bang 222 lefatše ka bophara. Ka thoko ho 'mino e ne e boetse e le sengoli, e le motho ea thusang batho ba bahloki, mohoebi le sebakali sa papali ea kalaneng. Mofu ke ngoana oa bone ho ba 12 ba bafu ntate Lee Parton le Caroline Avie Lee Parton. Moea oa hae o ke o phomole ka khotso ka mohau oa Molimo!



# Khatala o hapa bokhotho-khotho

**Tšeliso Thakholi**

**S**emathi sa mabelo a malelele, N e h e n g Khatala o ikhabetse bokhotho-khotho ba chelete e kaalo ka M32,500.00 le 'mentlele oa Silifera kamor'a ho tsoa khoeleng a le boemong ba bobeli ka nako ea 00:28:21, a hlhlama mohloli e leng Tayla Kvanagh lebelong la Hollywoodbets Marathon la bolelele ba 10km le neng le tšoaretsoe Durban, Afrika Boroa, ka Sontaha sa la 30 Phato monongoaha.

Puisanong e khutšoanyane le Koranta ena ba bang ba limathi tsa mabelo a malelele ba thoholelitse Khatala ka tšebetso eo ea hae e tsoileng mat-


soho. Ba bontša hore lebelo lena ke a mang a boima haholo, kaha a hloka matla a mangata le lebelo le lengata. Ka hona mabelo ao a seng a ile a matha mathoa-song a selemo sena ke hona a ileng a mo thusa haholo ho nyolla sefutho sa hae, kaha morero oa hae e ne e le ho tla ikhapela lebelo lena.

Ho sa le joalo, lebelong lena mohloli ka ho basali e leng Tayla Kvanagh oa Afrika Boroa o hapile chelete e kaalo ka M40,000.00, mohope le 'mentlele oa Khauta, borarong ea eba Karabo Mailula oa Afrika Boroa ka nako ea 00:33:02. Likeleli Majara oa Lesotho o bontšitse boiphihlelo bo boholo lebelong lena, kaha a hlahile boemong ba botšelala ka nako ea 00:02:24.

Ka hoba banna Tshe-

po Tshite oa Afrika Boroa ke mohloli ka nako ea 00:28:18, bobeling ke Stephen Ngigi Kangethe ho tsoa Naheng ea Kenya ka nako ea 00:28:21 ha borarong e bile letsoalloa la Afrika Boroa e leng Kabelo Mulaudzi ka nako ea 00:28:28. Bahlololi ka ho banna ba ntse ba ikhabetse meputso le likhau tse tšoanang le tsa basali.

Ho sa le joalo, semathi sa lesotho sa boemo ba machaba, Tebello Ramakongoa-na o hlahile boemong ba boraro lebelong la Sydney marathon la bolelele ba 42km le neng le tšoaretsoe Sydney, Australia, ka la 31 Phato monongoaha. O nkile nako ea 2:04:57, 'me ke lekhetlo la bobeli ka tatellano a hlahile boemong ba boraro, kaha lekhetlong la pele e bile ka selemo 2025.



# Gracious e tereka mokhethoa

**Tšeliso Thakholi**

**M**okhethoa oa Naha oa Banna o amohetse le ho hlahisa seaparo se secha sa papali ea Basketball se nehelanoeng ke Kampani ea Moroko le Liphahlo ea Gracious Garments, seo o tlii'o se sebelisa bakeng sa lipapali tsa machaba tsa setsoalle tseo o tlang ho libapala Motse-Moholo Maseru mafelong ana a beke. Tšebetso ena e bile holong

ea Komisi ea Lipapali le Boithapollo (LSRC), Maseru ka la 2 Loetse 2026.

H'a nehelana ka seaparo sena lebitsong la kampani ea habo, Mofumahali 'Maboitumelo Tlabaki o itse o ikutloa a le motlotlo haholo ho kenya letsoho kholisong ea lipapali kahare ho naha, empa ka ho khetholoha ea Basketball, kaha seo ba se entseng ka ho fana ka seaparo sena se setlehali ke pontšo e kholo ea ho ananela tšebetso eo ba e fumanang ho sechaba sa Basotho.

"Ketso ena ke morero oa rona oa ho khutlisetsa sechabang." O boletse joalo a bile a tiisa hore lenyalo lena la bona le Mokhatlo oa Lesotho oa Papali ea Basketball (LBA) le tlii'o tsoelapele le kamor'a lipapali tsena tsa machaba hang hoba li fihle pheletsong.

Ha amohela seaparo sena President ea Mokhatlo oa Lesotho oa Papali ea Basketball, Monghali Molupe Ratšolo o qalile pele ka ho isa liteboho tsa hae tse khethehileng ho Kampani ea Gracious Garments ka

tšebetso eo ba e fumaneng. A etsa kopo e khethehileng hore tšebetso ena e se e ka e ka anela lihlopheng tsohle tsa papali ea Basketball.

"Re lebohile haholo beng ba ka ka 'nete! Botsamaisi ba lipapali ba a le bona hore le teng, le kentse letsoho le toma ho tšehetsa lipapali, e leng ntho e kholo eo e leng morero oa rona Lesotho mona oa ho bona hore re phahamisa papali ka bo eona ho bona hore e'a hola." O boletse joalo h'a isa mantsoe a hae a ho qetela a teboho ka thepa eo ba e

fumaneng.

Lebitsong la Komisi ea Lipapali le Boithapollo (LSRC), Monghali Teboho Malataliana o ipilelitse ho mokhatlo ho khutlisa molemo ho motšehetsi oa bona ka ho reka lihlahisoa tsa bona, hoba bapatsa mabaleng ohle ao batla tšoarela lipapali tsena ho ona le ntlheng ea theolelo ea lekhetlo. "Ke tla thaba haholo ha nka bona lipapaling tsena tse tlang lipapatso tsa bona li le teng mabaleng ohle ao le tlii'o tšoarela lipapali tsena ho ona." O boletse joalo a phethela ka ho hlokomelisa mokhatlo hore ha bafani ba fane ka lerato ba lokela hore le bona ba khutlisetsa ho bona ka hore ba bapatse thepa ea bona, e le ho holi-sa le ho tsebahatsa lihlahisoa tsa bona.

Mokhethoa ona oa naha o tlii'o bapala o iterekile ka seaparo se secha lipapaling tsa machaba tsa setsoalle tsa Four Nations Basketball Tournament, tse tlii'o tšoareloa kahare ho naha mafelong a beke ena ho tloha ka la 4 ho isa la 6 Loetsoe monongoaha, moo o tlang ho qothisana lehlokoa le linaha tse 'ne tsa tikoloho ea Afrika e leng Botswana, Eswatini, Afrika Boroa le Malawi.

